



PATNUBAY SA MISA



22 Nobyembre 2015

Dakilang Kapistahan ng Pagkahari ni Hesukristo

Taong B

HULING LINGGO NG TAONG LITURHIKO "B" KATAPUSAN NG "TAON NG MGA MAHIHIRAP"

Mabuhay ang Hari ng Ating mga Pusong!

Sa huling Linggong ito ng taong liturhiko, ginaganyak tayong muling magpatibay sa ating katapatan kay Hesus bilang Panginoon at Hari natin. May panibago rin tayong pagkakataon para maunawaan ang dami ng mga biyayang kaloob sa atin ng Panginoon sa taong liturhikong ito. At sa paggunita sa ganitong mga biyaya, malugod nating ipahayag ang ating tapat na pasasalamat sa mga ito.

Sa katapusan ng Misa, pagtitibayin nating muli ang paghahandog ng ating mga sarili, pamilya, at ng buong bansa kay Hesus, Hari ng Sanlibutan. Nawa ang pagdiriwang natin sa Eukaristiyang ito ay maging malinaw na pagpapakita ng ating pagmamahal sa kanya na ating Panginoon at Tagapagligtas. Gayundin, ito nawa'y maging isang natatanging pagkakataon para muli nating italaga ang ating mga sarili bilang kanyang mga tapat na alagad.



PASIMULA



Pambungad

(Ipahayag lamang kung walang awiting nakahanda.)

Ang Korderong inialay ay marapat paghahandog ng kadakilaa't dangal, pagkilala't pagpupugay, siya'y Haring walang hanggan.

Pagbati

P –Mabuhay si Hesukristong ating Hari! Ang kanyang biyaya at kapayapaan ay sumainyong lahat!

B –At sumaiyo rin!

Pagsisisi

P –Sa paghahanda natin para sa pagdiriwang ng mga Banal na Misteryo, alalahanin natin ang ating mga kasalanan at hilingin sa Panginoon ang kapatawaran at lakas. (Manahimik saglit.)

P –Panginoong Hesus, ikaw ang Hari ng Katotohanan at Buhay. Patawarin mo nawa ang ano

mang isipan, salita, o gawa naming nakasakit sa aming kapwa. Panginoon, kaawaan mo kami!

B –Panginoon, kaawaan mo kami!

P –Panginoong Hesus, ikaw ang Hari ng Kabanalan at Biyaya. Patawarin mo ang aming mga kasalanan ng materiyalismo, kasakiman, at kapalaluan. Kristo, kaawaan mo kami!

B –Kristo, kaawaan mo kami!

P –Panginoong Hesus, ikaw ang Hari ng Katarungan, Pag-ibig, at Kapayapaan. Patawarin mo ang aming mga pagiging dimakatarungan, pagkamuhit, at kapusukan. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, sa iyong Anak na pinakamamahál at Hari ng sanlibutan, niloob mong pag-isahin ang tanan. Idulot mong ang tanang kinapal na pinalaya sa kaalipinan ay makapaglingkod sa iyong kadakilaan at makapagpuri sa iyo nang walang humpay sa pamamagitan ni Heskristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa Dan 7:13-14

Ang “Anak ng Diyos” na pinagkalooban ng kapangyarihan, kaluwalhatian, at paghahari ay isang propetikong larawan ng Muling Nabuhay. Siya ang darating sa wakas ng panahon upang magpahayag ng kanyang walang hanggang paghahari sa sanlibutan.

L –Pagpapahayag mula sa Aklat ni Propeta Daniel

Samantalang ako’y namamahinga sa gabi, patuloy ang aking pangitain. Ang nakita ko naman ay isang tila taong nakasakay sa ulap. Bumaba ito at lumapit sa nabubuhay magpakailanman. Binigyan siya ng kapamahalaan, ng karangalan at ng kaharian. Siya ay paglilingkuran ng lahat ng tao, bansa at wika. Ang pamamahala niya ay di matatapos at hindi babawiin, at hindi mawawasak ang kanyang kaharian.

Ang Salita ng Diyos!

B –Salamat sa Diyos!

Salmong Tugunan Awit 92

B –Panginooy naghari na! Ang damit n’ya’y maharlika!

R. M. Velez



* Panginooy naghahari, na ang suot sa katawan ay damit na maharlika at batbat ng kalakasan. **B.**

* Ang sandigan ng daigdig, matatag ang pinatungan, kahit ano ang gawin pa’y hindi ito magagalaw. Ang trono mo ay matatag simula pa noong una. Bago pa ang ano pa man, likas ikaw’y naroon na. **B.**

* Walang hanggan, Panginoon, ang lahat ng tuntunin mo, sadyang banal at matatag ang sambahang iyong templo. **B.**

Ikalawang Pagbasa Pah 1:5-8

Ang maikling siping ito na buhat sa paunang salita sa Aklat ng Pahayag ay nagtataglay ng paglalarawan ng ginawa ni Heskristo at patuloy pa ring ginagawa para sa atin. Dahil sa pag-ibig sa atin, pinalaya niya tayo sa ating pagkakasala at ginawa niya tayong isang marangal na bayan ng mga saserdote. Dahil dito, siya ang ating karapat-dapat na Hari.

L – Pagpapahayag mula sa Aklat ng Pahayag

Si Heskristo ang tapat na saksi, ang unang nabuhay sa mga patay, at Hari ng mga hari sa lupa. Iniibig niya tayo at sa kanyang pagkamatay ay pinalaya niya tayo mula sa ating mga kasalanan. Ginawa niya tayong isang liping maharlika upang maglingkod sa Diyos at kanyang Ama bilang mga saserdote. Kay Heskristo ang kapurihan at kapangyarihan magpakailanman! Amen. Pakatandaan ninyo! Darating siyang nasa mga alapaap, makikita ng lahat, pati ng umulos sa kanyang tagiliran; dahil sa kanya, iiyak ang lahat ng lipi sa lupa. Magkakagayon nga. Amen.

“Ako ang Alpha at ang Omega,” wika ng Panginoong Diyos na Makapangyarihan sa lahat, Diyos sa kasalukuyan, sa nakaraan, at siyang darating.

Ang Salita ng Diyos!

B –Salamat sa Diyos!

Aleluya

B –Aleluya! Aleluya!

Pagpalain dumarating sa ngalan ng Poon natin, paghahari’y kanyang angkin. Aleluya! Aleluya!

Mabuting Balita Jn 18:33-37

Habang sinusubok ni Pilatong siyasatin ang batayan ng pagsasakdal kay Heskristo, lumabas ang katotohanan tungkol sa Pagkahari ni Kristo. Tunay ngang si Heskristo ay “Hari,” bagamat hindi gaya ng mga hari ng mundong ito.

P –Ang Mabuting Balita ng Panginoon ayon kay San Juan

B –Papuri sa iyo, Panginoon!

Noong panahong iyon, itinanong ni Pilato kay Heskristo, “Ikaw ba ang Hari ng mga Judio?” Sumagot si Heskristo, “Iyan ba’y galing sa inyong sariling isipan, o may nagsabi sa inyo?” “Ako ba’y Judio?” tanong ni Pilato. “Ang mga kababayan mo at ang mga punong saserdote ang nagdala sa iyo rito. Ano ba ang ginawa mo?”

Sumagot si Heskristo, “Ang kaharian ko’y hindi sa sanlibutang ito. Kung sa sanlibutang ito ang aking kaharian, ipinakilabang sana ako ng aking mga tauhan at hindi naipagkanulo sa mga Judio. Ngunit hindi sa sanlibutang ito ang aking kaharian!” “Kung gayon, isa kang hari?” sabi ni Pilato. Sumagot si Heskristo, “Kayo na ang nagsasabing ako’y hari. Ito ang dahilan kung bakit ako ipinanganak at naparito sa sanlibutan: upang magsalita tungkol sa katotohanan. Nakikinig sa aking tinig ang sinumang nasa katotohanan.”

Ang Mabuting Balita ng Panginoon!

B –Pinupuri ka namin, Panginoong Heskristo!

Homiliya

Sumasampalataya

B –Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Heskristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Si Kristo ang Hari ng sanlibutan. Siya ang unang anak ng sangnilikha; buhat sa kanya nagmumula ang lahat ng magaling. Buong pananalig tayong manalangin:

B—Kristo, aming Hari, dinggin mo kami!

* Kristo, aming pastor, tipunin mo sa iisang kawan ang iyong mga tupa buhat sa bawat bayan, at pastulan sila sa saganang damuhan. Manalangin tayo! **B.**

* Kristo, aming Tagapagligtas, pagalingin mo ang mga maysakit, hanapin ang naliligaw, gabayan ang malalakas, pabalikin ang mga nalihis ng landas, at palakasin ang mga nag-aalinlangan. Manalangin tayo! **B.**

* Hukom ng lahat ng tao, kapag ibinalik mo ang kaharian sa iyong Ama, ilagay mo nawa kami sa iyong kanan, upang manahin namin ang Kahariang inihanda na para sa amin sa pagsisimula pa man ng mundo. Manalangin tayo! **B.**

* Prinsipe ng Kapayapaan, lipulin ang mga sandata ng digmaan, at turuan ang mga taong mamuhay nang maayos, at nang may paggalang at pakikipagtulungan sa isa't isa. Manalangin tayo! **B.**

* Kristo, tagapagmana ng lahat ng bansa, pagbuklurin mo ang sangkatauhan sa iyong Simbahan upang lahat ay magmahal at maglingkod sa iyo bilang kanilang Panginoon. Manalangin tayo! **B.**

* Kristo, na una sa mga yumao, ihatid mo nawa ang lahat ng namatay sa kaluwalhatian ng muling pagkabuhay. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil saglit.*) Manalangin tayo! **B.**

P—Panginoong Hesus, Hari ng sanlibutan, pagharian mo ang aming bayan, mga pamayanan, at mga pamilya. Nawa lahat ng aming sabihin, isipin, at gawin ay makatulong sa ikatutupad ng iyong plano ng pag-ibig. Ikaw na nabubuhay at naghahari magpakailanman.

B—Amen!

PAGDIRIWANG NG HULING HAPUNAN



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, sa paghahain namin ng mga alay sa ikapagkakasundo ng sangkatauhan, iniluluhog naming ang iyong Anak nawa'y magbigay ng mga kaloob na pagkakaisa at kapayapaan sa pamamagitan niya kasama ng Espiritu Santo magpasawalang hanggan.

B—Amen!

Prepasyo

P—Ama naming makapangyarihan, tunay ngang marapat na ikaw ay aming pasalamatan.

Hinirang mong tagapaghain ng tanan ang iyong Anak na Panginoon ng sanlibutan. Pinadaloy mo sa kanya ang langis ng kasiyahan tanda ng paghirang mong pangmagpakailanman. Sa paghahaing ginampanan niya sa krus, siya ang dalisay na tagapagbuklod, siya ang gumanap sa aming pagkatubos, siya ang sumakop sa sansinukob. Ang kanyang paghaharing lagi sa lahat ay siyang lubusang naglalahad ng iyong kadakilaang matapat upang buhay mo'y sa lahat maigawad. Sa paghahari niya, lahat ay hinahatian sa iyong kagandahang-loob at kabanalan, sa iyong dangal at kapayapaan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.

PAKIKINABANG



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinaabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B**—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang

(*Ipahahayag lamang kung walang awiting nakahanda.*)

Maghahari kailanman ang Panginoon sa tanan. Pagpapala'y ibibigay ng Poon sa kanyang bayan upang tana'y matiwasa'y.

Paghahandog ng Sangkatauhan kay Kristong Hari

Katamis-tamisang Puso ni Hesus, Mananakop ng sangkatauhan, masdan mo kaming nagpapatirapa nang buong kapakumbabaan, sa harap ng iyong dambana; kami ay iyo at kailan ma'y ibig naming maging iyo. At upang mabuhay kami sa lalong mahigpit na pagkakasanib sa iyo, kaming lahat at bawat isa sa amin ay naghahandog ng aming sarili ngayon sa Kamahal-mahalang mong Puso.

Marami, sa kasawiang palad, ang hindi nakakakilala sa iyo; marami, sa pagpapawalang halaga sa iyong mga utos, ang nagtatakwil sa iyong mga utos, ang nagtatakwil sa iyo. O Hesus, kaawaan mo sa iyong kamahal-mahalang Puso.

O Panginoon, maghari ka, hindi lamang sa mga tapat na anak na kailan ma'y hindi humihiwalay sa iyo, kundi rin sa mga alibughang lumayo sa iyo. Sila'y pabalikin mong madali sa tahanan ng Ama upang hindi mamatay sa gutom at karalitaan. Maghari ka sa mga taong humiwalay sa iyo dahil sa hibo ng kamalian o diwa ng paghihidwaan. Ibalik mo sila sa daungan ng katotohanan at sa pagkakaisa ng pananampalataya, upang sa madaling panahon ay mapisan sila sa iisang pananalig at sa pamamahala ng iisang pastor.

Maghari ka sa mga nananatili pa hanggang ngayon sa kadiliman ng pagsamba sa hindi tunay na Diyos. Marapatin mong akitin silang lahat

sa iyong liwanag at kaharian. Sa wakas, pagkalooban mo, O Panginoon, ng katatagan at matibay na kalayaan ng iyong Iglesya, igawad ang katahimikan at kaayusan sa lahat ng mga bansa, at bayaang ang magkabilang panig ng daigdig ay umalingawngaw sa iisang tinig: Purihin ang Kamahal-mahalang Puso ni Hesus na bukal ng aming kaligtasan, at sa kanya'y ang awit ng karangalan at kaluwalhatian sa lahat ng panahon! Siya nawa.

Panalangin Pagkapakinabang

P –Ama naming mapagmahal, kaming pinapakinabang mo sa pagkaing nagbibigay-buhay ay nagsusumamong kaisa niyang makapamahay sa kaharian sa langit magpakailanman pakundangan sa karangalang sundin ang mga kautusan ng Haring si Kristo sa sanlibutan sa pamamagitan niya kasama ng Espiritu Santo magpasawalang hanggan.

B –Amen!

PAGWAWAKAS



P –Sumainyo ang Panginoon.

B –At sumaiyo rin!

P –Magsiyuko kayo at ipanalangin ang pagpapala ng Diyos. (*Manahimik saglit.*)

Iligtas nawa kayo ni Kristong Hari sa lahat ng panganib at ipaalaala sa inyong lagi ang kanyang mapagligtas na pagmamahal.

B –Amen!

P –Tibayan niya nawa ang inyong pananalig upang kayo'y maging matapang na tagapagbalita ng kanyang Kaharian.

B –Amen!

P –Akayin niya nawa kayo sa kanya, at turuan kayong manunton sa pagkakawanggawa at kapayapaan.

B –Amen!



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molmog, D. Daguio,

V. David • Illustrations: A. Sarmiento, B. Cleofe • Circulation: F. Edjan

P –At pagpalain kayo ng makapangyarihang Diyos: Ama, Anak, at Espiritu Santo.

B –Amen!

P –Humayo kayo sa kapayapaan at itatag ang Kaharian ng Diyos saanman kayo naroroon.

B –Salamat sa Diyos!

Mga Katangian ng Kaharian ni Kristo

Nagkamali si Herodes. Nang mabalitaan niya ang pagsilang ng isang bagong hari ng mga Judio, ipinag-utos niya ang pagpatay sa mga inosenteng sanggol, na laging ikaalaala sa kanya nang buong takot. (*Sangguniin Mt 2:16.*)

Sa bagay na ito, mas matalino si Pilato. Wala siyang nakitang pagbabanta kay Hesus sa pamumuno ng mga Romano. Wala siyang ano mang nakitang sala sa tagapangaral at pilosopong taga-Nazaret na higit na interesado sa katotohanan kaysa kapangyarihang pulitikal. (*Sangguniin Jn 18:38.*) Di ito dahil higit niyang naunawaan ang paglilinaw na ang kaharian ni Hesus ay “hindi sa mundong ito.” Para sa kanya, sapat nang marinig niyang walang ano mang ambisyon si Hesus sa pulitika.

Ngunit para sa mga nagmamahal kay Hesus at interesado sa Kahariang kanyang ipinangaral nang tatlong taon, ang kanyang sagot sa pinunong Romano ay tunay na nakapagtataka. **Ang sagot ni Hesus ay isang paanyayang pagnilayan ang kalikasan at kahingian ng kanyang Kaharian.** Ano nga kaya ang Kahariang ito, na ibang-iba sa alin mang makamundong kaharian, imperyo, o republika? Isang kahariang walang nakikitang hangganan, walang mga buwis, walang pamahalaan, walang hukbo?

Ang Paghahari ni Kristo ay isang “Paghahari mula sa loob.” Saklaw nito ang buong pagkatao: katawan, pag-iisip, at kalooban. Walang pantaong di nito saklaw. At lahat ng taong inaanyayahang maging bahagi nito – lahat ng lahi, kultura, at wika ay makatatagpo rito di lamang ng isang ano mang lugar, kundi ng kanilang “tahanan.”

Ang Kahariang ito ay **tatagal magpakailanman.** Ang ningning ng mga tagumpay nito at ang katuparan ng kanyang palatuntunan ay lampas pa sa madilim na abot ng panahon at pagkasira. Ang Paghahari ni Kristo ay magpakailanman. Kabahagi ito ng pagiging walang hanggan ng kanyang Hari, at humahango ito ng sigla sa Bukal mismo ng Buhay.

Itinatag sa abo ng bulok na sangkatauhan at ngayo'y pinagbagong buhay ng mahabaging pag-ibig ng Diyos, **ang “kaibang” Kahariang ito ay ipinagbuwis ng buhay ng nagtatag dito. Patuloy ito tungo sa pangwakas na tagumpay** sa kabila ng paminsan-minsang pagkatalo.

Ang nakapangingibabaw sa programang ito ay ang ganap at pangmatagalang kaligayahan ng lahat ng tao. Ang bandila't sagisag nito ay ang nagniningning na krus; at ang pangunahing kautusan nito ay pag-ibig sa Diyos at sa kapwa. Bagamat mahigpit sa kanyang mga kahingian, ang kautusang ito ay nag-aangkin ng kapangyarihang mapagbago nito ang mga hamak na nilalang para maging mga anak ng Kataas-taasan, sunod kay Hesus, ang Unang-silang sa pamilya ng Ama.

Gayon ang tila x-ray na larawan ng Kahariang tinanggihan ng mga Judio at di itinuring na mahalaga ni Pilato. Para sa ating mapalad na maging bahagi nito, ito na ang pinakamahalagang kayamanan ng tao – bagay na, para maangkin, ay sukat nating ipagbuwis ng lahat, maging buhay man nating pisikal.